

DISSERTATIO PRACTICO-MEDICA
INAUGURALIS,
DE
LACTIS DEFECTU,
QUAM,

ANNUENTE SUMMO NUMINE,

Ex Auctoritate MAGNIFICI RECTORIS

EWALDI HOLLEBEEK,

THEOLOGIAE DOCTORIS ET PROFESSORIS IN
ACAD. LUGD. BAT. ORDINARIJ.

NEC NON

Amplissimi SENATUS ACADEMICI *Consensu,*

& Nobilissimae FACULTATIS MEDICAE *Decreto,*

PRO GRADU DOCTORATUS,

Summisque in MEDICINA Honoribus & Privilegiis
ritè ac legitimè consequendis,

Eruditorum Examini submittit

JOANNES GUILIELMUS THORVARTH,

RIGA-LIVONUS.

Ad diem 24. Februarii MDCCLXIV. H. L. Q. S.



LUGDUNI BATAVORUM,

Apud THEODORUM HAAK, 1764.

Naturam humani, uti alius cujusque corporis naturalis semel
a Deo in motum constituti, consistere arbitror „ in me-
„ chanico & hydrostatico solidarum fluidarumque partium
„ diversissimarum artificio, & singulis particulis impresso
„ nisu, motu, & directione, earumdemque proportionem
„ tum inter se, tum ad ceteras naturae universi partes, a
„ quibus vel intrinsecus, vel extrinsecus, afficiuntur.

P. G. WERLHOF,
Obs. de Febris. p. 311.

DEO T. O. M.

P A T R I,

PRAECEPTORIBUS,

P A T R O N I S,

A T Q U E

A M I C I S,

S A C R U M.

DEO T. O. M.

P A T R I

PRÆCEPTORIBUS.

P A T R O N I S.

A T Q U E

A M I C I S.


S I C R U M



DISSERTATIO PRACTICO-MEDICA
INAUGURALIS,

DE

LACTIS DEFECTU.



§. I.



economiae corporis humani muliebris con-
sentaneum est, partum non edere modo
maturum; sed lactis etiam, in mammis
parati, alimento, animalis instar vivipa-
ri, nutrire. Utrumque hoc munus, quod
naturali quodam nexu cohaeret, matris
& nomen, & amor in prolem tenellam,
complectitur. Primo, eique graviori, succedit brevi al-
terum,

terum, quod tantum abest, ut molestiam creet, ut pergratum plerumque accadat. Immo, si rite procedat opus, ad sanitatis, a partu magis minusve infraetae, restorationem cum maxime pertinet. Sed, quod amabili cum sexu doleas, eximia illa mammarum functio, perinde ac quaevis aliarum partium, multiplici saepe modo laedi solet. Observatur enim quotidie, vel justo citius *imminui*, vel plane *intercipi*, vel contra *augeri* nimium, vel pervarie *vitiari*. Quod si imminuta est, lac non ea generatur copia, quae alendo probe infanti sufficiat. Intercepta, vel abolita, ejus se defectu prodit, mammis, vel sanis ceterum, vel male affectis, plane feriantibus. Aucta, quae dicitur, tantum lactis, elargitur, ut nec uberiori suctione exauriri queat. Atque vitiata demum Medicis ad depravatam succi illius indolem, vel qualitates morbosas, refertur.

Quibus consideratis, operae pretium mihi visum fuit, *Lactis defectum* hoc in specimine inaugurali speciatim prosequi. Quod dum Eruditorum, quos inter Praeceptores meos, Academiae hujus Professores Medicinae celeberrimos, maxime veneror, examini subjicio; benignam defectus virium ingenii in tractanda hac materie momentosa excusationem vehementer rogo.

§. I I.

Lactis defectus, generatim si spectetur, in *naturalem* ac *praeternaturalem* principio dividi potest. Naturalis, quae sanitatis optimaе complexu continetur, in quavis femina, vel virgine, vel muliercula, non puerpera, locum habet.

Prae-

Praeternaturalis vero affectio quaedam morbosa est, qua, definito lactatus tempore, mammae, officio suo defungi, impediuntur. Prior quidem an recte defectus dici queat, vulgarem hujus vocis significationem si sequaris, fortasse dubites. Videtur enim, cum non adsit, qui lacteat, infans, nulla lactis penuria esse statuenda. Verum quod ad rem attinet; haec, arbitror, cuique, a Theoria instructo medica, clare oppido patet. Namque Naturae lex docet, mammas dictas femineas, puerperio non praegresso, Galactopoiesin sponte obire nunquam. Posterior, qui occurrit, lactis defectus, praeternaturalis ac verus, nomine suo vulgo constat. Manifestum est, quod, habita matris & infantis ratione, tum ad secretionem humoris illius, tum evacuationem secreti, impeditam revocari possit. De utraque ejus specie, quam Pathologia medicinalis tradit, ex instituto jam agere aggredior.

§. III.

Verus lactis defectus, generalissime descriptus (§. II.), mulierculis contingit, quae lactandi provinciam obtinent. Ad quam ineundam, aliae citius, tardius paullo aliae, accedunt. Quae aliquoties ei operam dedere, intra quatuor & viginta horas post partum, saepe jam mammis suis lacteo humore scatent. Primiparae autem, tam juniores, quam adultiores, pluresque, tertio quartove demum die lactantis partes implere valent. Illaeque tunc primo lympham quandam edunt chylosam, quam *Colostrum* vocant. Quo educto, genuinum atque alibile lac, quod colore & sapore se pluri-

mum commendat, jugiter producant. Id ipsum dein, si recte valent, producere pergunt, donec infantes suos, solidiori victu uti aptos, a mammis disjungere queant. Atque *periodus* haec *lactationis* est, quae, communi experientia teste, brevius longiusve per tempus saepenumero excurret. Solet enim alias novem mensibus circumscribi, & ad quindecim, sexdecim, viginti, ac plures usque alias, extendi. In genere quidem lactentium aetate, qua, eruptis dentibus, crassiorum ciborum appetitus emergit, quam optime definitur. Enimvero aetas illa haud adeo constat omnibus, quin variam in anni secundi partem, post primam sextam, quintam, vel quartam, incidat. De qua notandum, quod infantilis corporis robori tantum respondeat, quo felicius crescente, functionum naturalium vigor maturius efflorescit. Ex quibus apparet, quid de sinistro, quo lactis defectus nasci possit, tempore censendum sit. Hoc, perquam memorabile, procul dubio statuta lactationis periodo metiri oportet. Cujus a principio quo minori abest intervallo; eo majoris momenti considerationem offert Pathologo, qui morbi rationem sedulo attendat.

§. I V.

Mammae genuini lactis (§ III.), cujus solae officinae sunt, defectum morbosum (§. II.) proxime patiuntur. Possunt vel ambae, vel una tantum, dextra nempe, vel sinistra, eo laborare. Utraeque si laborent *totalem*; si alterutra, *partialem* saltem, defectum inducunt. Ubi forte plures existant, ab Observatoribus passim memoratae, divisionem

nem eandem, parum mutatam, admittunt. Binae autem, quae secundum naturam adsunt semper, cur feminino sexui datae sint, Anatomici omnis aevi merito disquirunt. Sagaciores ex his tam ob commoditatem, quam usum necessarium, tot datas esse, egregie consentiunt. Etenim debere cognoscunt mammas soboli, recens natae, alimentum prospicere, ad quod debita copia exhibendum, non facile sufficere unam, nisi ingens esset, mediamque thoracis sedem occuparet. Ejusmodi praegrandem vero, aucta magnitudine ac mole, praeter deformitatem, maximum femellis incommodum allaturam. Idcirco eas duabus esse minutioribus praeditas, quae, utrique pectoris lateri eleganter adjectae, extus modice emineant, lactisque tantum, quantum nutriendo foetui satis, commode generent. Ad haec cum geminae sint, fieri, ut, una modo si vigeat, haec alterius, morbo afflictæ, vicem supplere possit. Qui usus utique, non spernendus, praesertim si noxius valde lactis defectus respiciatur, plurimum momenti habet. Partialis enim persaepe accidit, ut tamen infantulus nihil, vel parum, detrimenti inde percipiat. Mammilla sana tunc praeclare adeo res gerit suas, ut vix sociam desideretur. Quid? quod sola illa observetur subinde plus solito gignere lactis, eoque metuendam alias jacturam abunde compensare. Hinc matres nutricesque reperiuntur, quae vel gemellos vegetos unius largioris mammae beneficio ubertim lactare queant. Ad eam, obstructa altera, vel male conformata, mechanica quadam ex necessitate materiam lactis confluere, crederes.

§. V.

Lactis defectus, in universum spectatus, unde & quomodo oriatur, ordine jam investigandum est. Disquisitio haec pathologica, ut liquet, celebri illa de Galactopoiesi doctrina maximam partem nititur. Ea inter plures, quae ad oeconomiam animaleam pertinent, Physiologorum animos & tenet diu, & exercet. Principia ejus, quae circa naturam proxime versari videtur, generaliora dictant:

- I^o. Inesse semper eo, quo lac paratur, tempore (§. III.) mammis majorem, quam ante, actuositatem;
- II^o. Consistere hanc tum in vasorum, tum fluidorum, isthaec percurrentium, motu auctiori;
- III^o. Utrorumque motum mirifice conspirare, & mutuo veluti impetu, probe modificato, vigere;
- IV^o. Priorem vasorum actionem ab insita procul dubio vi vitali manare, eique excitatae fortius continuo respondere;
- V^o. Illam excitari opportuna systematis mammarum arteriosi praesertim irritatione, a stimulo facta materiali, quem fortasse naturalem appelles;
- VI^o. Actionem, inde natam, necessaria ex circulationis campo allicere fluida ad organa galactopoietica largius permeanda;
- VII^o. Secernere haec ex iis continuato opere lac, idque
- VIII^o. Secretum & contentum aliquantis per infanti hauriendum praebere.

§. VI.

§. V I.

Ineunte lactationis periodo (§. III.), mammae actuosae Naturae legi convenienter, munus suum capeffunt. Editus tunc recens foetus est, cui nutrimentum, quo tenellus indiget, liquidum & concoctu facile perficiant. Solent equidem, fateor, jam gravidis, ultimo potissimum gestationis mense, ab affluentibus copiosius humoribus adeo turgere, ut valde durescant. Verumtamen, si bene constitutae sint, distentae licet, a solemni lactis secretionē vacant. Et quidni provido certe vacant consilio, cum alioquin id, quod utile ac necessarium, uteri incolae detraherent profunderentque. Mammae ergo haud alio rectius ullo, quam statuto, tempore integram functionem suam efficiunt. Ad quam exercendam, actuositatem memoratam (§. V. n. I.) obtineant, oportet. Quae enim nisi major foret vegetiorque, quam ante & post praegnationem, Galactopoiesi minime fungerentur. Nihil profecto intemeratis deest virgineis, sive structuram spectes organicam, sive energiam illam admirabilem, quam Medici vitalem vocant. Structura quin iis perfecta sit & usui suo accommodata, nemo Anatomicorum facile dubitat. Neque energia deficit vitalis, quae naturalem agendi potestatem, corpori humano propriam, inspiret. Quin immo tanto se praebet valentiorē; quanto meliori in statu sanitatis versatur. Qua, ceteris integris, accedente, virginum mammae, plenum semel lactae habitum, communia vitae florentis officia rectissime colunt. Quam vero haec etiam colant egregie; nihil tamen unquam, quod certo constat, lactis sponte producere possunt. Ad

hoc enim parandum , quò utitur Natura , actuositatis laudatae gradu non gaudent. Quique nec in praegnantibus, ubi multo eminentior evadit , eo adscendere usque solet, ut definitum fastigium attingat. Sana arbitror ratione assequi licet, id esse omnino definitum, quod percipi ceterum sensibus, ac geometricè demonstrari, nequit.

§. V I I.

Mammae actuositatem, ad conficiendum lac necessariam (§. VI.), aucto vasorum suorum fluidorumque motu praestant (§. V. n. II.). Artificiosissima organa sunt, quae glandulas inter conglomeratas easque principes referri solent. Anatome enim ostendit, quod ex innumerabilibus, in unam massam spectabilem, corpus mammae dictam, collectis colligatisque acinis glandulosis consistit. Omnes hi & singuli, dedita examinati opera, arteriarum venarumque, mirabili inter se convolutarum modo, congeries esse videntur. Pauci & exiles se iis commiscent furculi nervei, interseritque substantia tenuis fibrosa, ad subtilem conglomerationis nexum perficiendum. Mammae jam sic natae sunt, ut, quantum actuositate, tantum vasculosa fabrica polleant. Etenim haec vere sola est, quae, ut similis quaeque alterius glandulae, visceris &c. omnem actionem organicam complectatur. Eamque, quae viribus maxime excellit, pars arteriosa perenni suo, humorumque influentium, motu proxime edit. Proinde cum hic increscit, universam, quam constituit, mammarum actuositatem protinus auget. Non dubitandum, quin extra lactationis periodum

riodum (§. III.) cunctis, quae circulationi Harveanae praesint, vasis majoribus minoribusque insit. Namque sensibilibus, quos parit, vigoris, nutritionis, caloris &c. effectibus se reddit nobis manifestum. Minime autem credibile, quod tam acriter ibi eo tempore procedat, quam quo lactis fit generatio. Neque, quod aequali vi per minima, quae ei inserviunt, vascula sese diffundat. Fallor, ni his prope vel absit, vel exilior modo, qui ad integritatem servandam spectet, contingat.

§. VIII.

Ad mammarum lactantium actuositatem rite efficiendam enarratus vasorum fluidorumque motus mirifice conspirat (§. V. n. III.). Alter sequitur alterum, mutuaque incitatione, eximie temperata, veluti alit. Prior, qui arteriarum est, singulari lege regi videtur, qua semper praecedat. Aggreditur proxime, efficaci Naturae impulsu, opus, quod vicarium uteri non in scite appellant. Ubi primum provenit, in appulsos communi via humores continuo ruit. Citatiorique cum incessat gradu (§. VII.), pro re nata eos acrius oppido propellit agitatque. Mobiles illi, licet inertes sint, majori vi sibi illata, volvi se facile patiuntur. Nihil si moretur, vividiori etiam, quae ei respondet, celeritate, secundum obviam sibi directionem, currunt. Sed neminem fore, qui existimet, arbitror, quod uno pulsu temporisque momento per totum mammae corpus agantur. Non enim ex truncis arteriarum in ramos quosque remotiores, nisi successiva & legitime propagata earum systole,
pro-

protrudi possunt. Cui ut cedant commode, mole sua preffi, omnibus illis, quibus vehuntur, canalibus diastolen inducere debent. Quam, velut reactionis speciem physice consideratam, systoles actioni aequalem produci, ratio evincit. Apparet hinc in genere, qui memorabilis vasorum fluidorumque motus, quem lactantium mammae obtinent, mirabiliter conspiret. Equidem nisi perfecte conspiraret, assiduam iis actuositatem conciliare non posset. Ubi enim quam labem alteruter contrahat, qua obsequi impediatur, uterque, statim male cedens, functionem naturalem pervertit. Ad quam debite administrandam concors motus quoque modificato probe impetu viget. Manifestum est, quod eo reapse solo laudabilem actionis sanae formam tueatur. Potest, addito acriori stimulo, nimium intendi, ut lactis officinam potius destruat, quam actuosam servet & incolumem. Violentior ejusmodi, suppressis mensibus ortus, proximane sanguinis, e mammis quandoque, teste Observatorum (a) nube, fusi causa? Num quaeso alia sit ejus, ex strictioribus iratae papillis (b) excreti? Contra cum, quocunque velis, fato cessat, Galactopoiesin omnem sisti, res ipsa loquitur. Nihil attinet hic, plures enumerare mutationes sinistras, quas motus memoratus quandoque concipit. Animadvertere solummodo est, ejus rationem, ceterum absconditam, ita comparatam esse, ut in felici mammarum ministerio moderatum semper impetum sequatur.

§. IX.

(a) Quorum principes recensuerunt D. G. FRANCK. *de Franckenau* Satyr. XV. §. 59. Ill. HALLERUS in H. BOERHAAVE Prael. Acad. Tom. V. P. II. p. 88.

(b) C. S. VAN DER WIEL Obs. LXXIX.

§. I X.

Actio, mammarum propria, ab innumerabilium, quae per eas se diffundunt, arteriarum (§. VII.) viribus motricibus praecipue pendet. Hae, pro vigore suo singulari (§. VIII.), allata propellunt fluida usibusque necessariis adhibent. Liquet haud dubie, quod si etiam plures, quae momenti quid afferant, adsint, illae cum primis ad elaborandum lac pertineant (§. VII.). Neque recte unquam suas agant partes, nisi constitutum juxta *actuositatis* justae *regimen* sese gerant. Cui uti parent perfecte; ita conceptum eo impetum, praeclare modificatum (§. VIII.), constantissime edunt. Atque, quod forte mireris, edunt perinde, tanquam regimine illo *peculiari*, tantum non solo, continerentur. Namque parum abest, quin a *communi*, quod plurimas Microcosmi partes amplectitur, abhorrere omnino dici possint. Amplissimum illud, cui principatum merito tribuunt Medici, cor & systema arteriosum tenent. Haec enim vivido, quo micant, motu continuatoque quaquaversum, divisis veluti rivulis, deducunt humores, cunctas vitae functiones solemnes moderantur. Cum, quoad valent, se semper praestent actiosa; tum cursum etiam illarum aequabilem reddunt ac perennem. Sed, quam longe lateque extendant, supremam potestatem suam ad mammas usque non, nisi determinato valde modo, propagant. Etenim vigent persaepe optime, & optimo quoque sanguine redundant (ut solent certe haud raro in virginibus, tum juvenibus, tum adultis, solitae menstruationis

annos egressis, infoecundis, viris &c.), & glandulas tamen illas ad lac gignendum excitare nequeunt. Immo ne possunt quidem, si vel contentiori motu animali, rerumque aromaticarum & spirituosarum usu praevalidam agendi vim nactae sint. Quam enim dum more suo libere exercent, universam circulationem, quam vocant, ad majorem celeritatem aequabiliter perducunt. Et profecto, adhibitis benefensibus, quovis die observentur, tam aequabiliter, quam in calore febrili, perducere. Nec augere non quaslibet simul, quibus praesint, oeconomiae animalis actiones. Ut vero ad lactis genesis operam conferant; oportet praevia mammas actuositas subierit (§. VI.). Quae, comparatione quadam ut pateat, eam, qua obortus moeror gravis, aliusve animi affectus, innominatis exprimit e glandulis lacrimas, imitetur. Non dubium est, quin perinde, ac quaevis alterius partis corporis humani vivi, emergat. Scilicet latet, quasi sopita, in vi sic dicta vitali, qua mamillarum arteriae, aliarum instar sui generis, praesertim perfusae sunt (§. V. n. iv.). Eaque dum turgent polentque plurimum, sanissimae naturalem sibi & maxime commodam quietem affectant. Cave autem credas, quod in hoc quietis statu, vel inertes plane desideant, vel communem modo corporum obtineant mobilitatem. Paratissimae omnes ad suscipiendum motum, si bene cieantur, suscipiunt hunc sine mora & diffundunt. Eoque exserere majorem solent, quo cientur fortius, vel affici se acutioris sensus specie percipiunt. Qua ergo sanitatis rationi accommodata attemperataque causa ciente, aequum virium motricium citarum impetum induunt.

§. X.

Peculiare actuositatis regimen (§. IX.) in lactis generatione tam clare elucet, ut haud facile ulli, qui attenderit, obscurum esse queat. Distinguit se evidenter a generali actionum triplicium administratione, non origine tantum, sed duratione etiam & fine. Mammarum igitur systema, quod maxime ei patet, arteriosum singulari ad agendum vi incitari, sponte cognoscitur (§. IX.). Vis isthaec, proximo ab effectu deducto, nomine *stimulatricis* appellari potest. Quod si, quam variis a locis causisque manet, spectetur, multiplex fane occurrit. Interna, quae primo memoranda, vacuo ex utero, sanguinis menstrui evacuationem morante, existit. Observatum enim est (c), fuisse virgines, quae, mensibus tantum retentis, magnam lactis copiam in mammas receperint. Suspicionem graviditatis tectae, aliquamdiu sustenta, intaminatas, apertis sponte vasculis uterinis reddito, absque ullo abortus, vel partus, indicio, lunari tributo se exsolvisse. Mulierculis porro, uterum gerentibus, mamillas tumescere & humorem quandoque fundere lacteum, inter omnes constat. Puerperis dein verum lac ingenerare, praeter ea, quae tradita sunt (§. III.), vulgaris quemque edocet experientia. Adde demum, compertum esse (d), quod femina praegnans

(c) J. SCHENCK Obs. L. II. Obs. 289. Chr. Vega in Comm. ad Hipp. Aph. 39. S. V. ROD. a CASTRO Med. Polit. L. IV. C. 12.

(d) Erud. L. BIKKER in Tract. belg. qui inscribitur, Verhandeling van het Zog der Vrouwen. p. 78.

gnans visa, elapsis decem mensibus, massam quandam carnis, vel molam forte, ediderit. Cujus post ejectionem, & sanguinis fluxus, menstruo quantitate aequalis, lochiorum loco, & stato tempore lactis acciderit proventus. Hic jam uti interna, ita quoque externa, vi stimulatrice fieri posse scitur. Ad quam, quae primaria est, &, docente Natura, infantibus, vix dum sui consciis, nota *Suctio* referri meretur. Admiranda fateor, qui inexpectatam ejus efficaciam experti sint, hominum exempla habentur. Virgines integerrimas, suctis aliquamdiu ab infantibus mammis, lactantium induisse habitum, Historia medica nobis tradit (*e*). Quin vetulis etiam, quibus ob grandiore aetatem menses diu suppressae, solo puerorum suctu lac ad mamillas devenisse, tam copiosum, quo eos ad annum alerent, notatur. (*f*). Verum nec desunt, rariores licet, observationes de viris ipsis, qui pariter ac nutrices lactandi munere perfuncti sint (*g*). In Russia plerosque lac mammis continere, sat saepe multum, nota & apud omnes pervulgata res est. Licet suctioni adjicere lenem ac continuatam organorum galactopoieticorum, & praecipue papillarum, frictionem, pressionem, contrectationem assiduam, fomentationem similiaque plura stimulationum genera. Quae equidem, nisi ad lac parandum, tamen ad provehendum augendumque, quam maxime valent.

§. XI.

(*e*) PHIL. SALMUTH. Cent. I. Obs. 92. Ephem. Germ. Cur. anno II. Obs. 135.

(*f*) AM. LUSITAN. Cent. I. Cur. 47. J. SCHENCK. L. II. de Mam. Obs. 12. F. BOUCHARD in Eph. Germ. Cur. anno III. Obs. 10.

(*g*) ALEX. BENED. L. III. Anat. C. 4. J. SCHENCK. L. II. Obs. II.

§. XI.

Traditae summatim, caussae (§. X.) lactis efficientes, consentiente Medicorum schola, remotae appellantur. Inesse iis vim, qua motus vitalis legibus accommodatae agant, certis ex effectibus apparet. Primariae illae, quae reputentur, in principe genitalium muliebrium parte, utero nempe, resident. Ea hujus vivi ac sani indoles est, ut factam sibi irritationem, vel in, vel extra se, enatam, veluti animae praesentis actione, continuo percipiat. Observatu oppido mirabile, quam vehementer saepe lusu, vel aestu, imaginationis efferatur. Infomniis femellarum libidinosis eo quandoque solet abripi, ut ovula, ex ovariis soluta, elisisse legatur. Puellis tenerioribus mammae vix contrectari possunt, quin, tanquam ab admoto proxime stimulo, pruriat (*b*). Iisque, quae crebra viris juvenibus consuetudine miscetur, sanguine menstruo etiam crebrius manat. Sed quantane qualeso singularis illa agitatio est, quam ex appetitu & complexo venereo concipit? Quanta ex sola genitalium exteriorum titillatione? Ad quarum instar, Naturae cultores haud amplius dubitant, quin tumeat valde, turgeat, incalescat, exsiliat quasi, omnique se modo ad stimulationis rationem motitet. Ex quibus intelligas, missis aphrodisiacis, nullum forte reperiri organum, cujus, quam uteri, mobilius, sensilius, vel, si dicere mavis, irritabilius ingenium sit. Quocirca ille, praeter recensita in-

citat-

(*b*) H. J. Rega de Sympathia. Cap. XIV.

citamenta, complura admittit, suosque quaeque ad usus convertit. In primo nubilis aetatis, quam pubertatem dicunt, flore tam laete vigescit, ut, aucta actuositate, congestum sanguinem, bene floridum, ex diductis vasculorum suorum osculis emittat. Repetit hoc singulis mensibus negotium, & statum per annorum spatium, sobolis accommodatum procreationi, continuat. Uno alterove menstruum ante purgationem die, videtur a sanguine, sibi advecto, uberiori extumescere, eoque ut liberet se, anniti. Hocque majori minorive anniti opera, quo crescente sensim mole perfusus & onustus fortius, vel levius, exstimuletur. In gravida, primis duobus, vel tribus, a praegnatione mensibus, ejusdem fluidi contenti copia, quam tenellus embryo haud absumat, magis magisque irritari. Aliquot autem ante partum hebdomadibus (§. VI.), stimulis pluribus, ex fabricae, vasculoso fibrosae, expansione summa, tensione, humorum affluentia, partium vicinarum pressione, & placentae foetusque grandioris adhaesione incommoda, oriundis affici. Verum enim post partum (§. VI.) adeo affici egregie, ut, deposito onere, tensam relaxet compagem, distractam spasmis & percussam remittat, vitali paulatim constringat arctius arctiusque nisu, arctet, quod prae primis notandum, vasa, lochiorum fluxum plurimum sistat, solitum humorum incursum reprimat &c. Fieri nequit, ut cunctis his, & quae accedant, mutationibus, absque multiplici & varie modificata irritatione, defungatur. Quamque dum, pro facultatis suae intentione, percipit, omnes, oeconomiae suae proprios, nec satis admirandos, motus praestat. Et hi demum sunt, quibus incitatus uterus, defi-

definitis temporibus, & praesertim ultimis, vim suam stimulatricem luculenter probet.

§. XII.

Sed quaeritur jam, quo pacto uterus, distans a se longo intervallo, mammas vi stimulatricis suae (§. XI.) praeter aliis communicet. Quaestio haec maximi momenti, dudum quidem diuque agitata acriter, at nec dum plane persoluta, est. Dubitare licet, an, si rerum, in quibus versatur, subtilitas attento animo pensetur, ingenio humano unquam expediri possit. Videndum tamen, pro instituto nostro, quid lucis forte Theoria proposita (§. V.) ad eam illustrandam adspergat. Exploratissimum esse arbitror, quod mammae feminae insigni facultate percipiendi sentiendique, ob quam facillime cieantur, praeditae sint. Ostendunt nobis eam manifesta ratione, qua externae, cui situ suo commode patent, actioni (§. X.) auscultant. Internae, quae ab utero proficiscitur (§. X. XI.), tam parate subserviunt, ac si totae ab ejus nutu penderent. Nunquam equidem menstruatio incidit, quam non ante pariter, ac post, mutata facie sua praese ferant. Primae saepe numero conceptionis nuntiae sunt, citiusque, quam menses suppressae, apparent. Circa partum una cum utero, & aequo fere gradu, habita diversae magnitudinis respectu, intumescunt. Editto infante, & a matre separato, necessitate physica, servitii quadam specie, ejus agunt nutrices. Atque tunc, modo partes genitales titillantur, ut libido ardeat, insurgunt saepe, durefcunt, splendent, papillas exferunt, & quan-

quandoque ipsum lac, tanquam fontes salientes, mittunt. Ex quibus consequi est, quam mire irritabiles ac obsequiosae mammae partium illarum irritationibus moveantur. Non enim adeo promte aliis se accommodant internis, visceribus organisve, a quibus licet sede ac fabrica propius absint. Quidni igitur jure optimo cum genitalibus, tanquam sociis, intime conspirare dici possunt? Quidni privatum dici absolutumque colere commercium? Quod, ex quo observatum, Anatomicis philosophis ansam dedit, in nexum partium inquirendi. Veteres, inventis semel venarum epigastricarum mammariarumque anastomosibus, veluti detectae veritatis conscientia, acquiescunt. Posteriores de arteriis cognominibus, & Neoterici uno fere ore de nervis, loquuntur. Verum, quod dolendum, nemo eorum hactenus, quod sciam, eo pervenit, ut vasa isthaec, & nervos, ab utero ad mammas solas transire, demonstraverit. Vel, quod magis desideres, vasorum illorum nervorumque traditam actionem formae rei explicandae respondere. Verior hujus cognitio ea modo sequitur, quae Anatome animata partim, partim Theoria medica, de motuum vitalium ortu, progressu, decursu ac impetu vario, docent. Quibus positis, annuere oportet, utrum inter & mammas existare commercium, idque ad consensum singularem recte referri. Possit hunc effici, efficique percommode, mutua, qui ex irritatione fibrarum contractilium emicent, motuum (§. XI.) propagatione. Quorum directioni necessariae moderatricem praesse optimam, quam Medici Naturam vocant. Haec rite ut more suo praesit, necessum modo esse, partes sint integrae. Quatenam vero harum ad memoratum commercium

cium proxime pertineant, an venae, arteriae, nervi, membranae, vel aliae, haudquaquam patere. Omnes forte communi, ut sic dicam, spiritu fruenter, eoque sano sibi deservientes invicem, uno solidorum vivorum nomine, concurrere. Praepositis sensibus nervis, ceteras sic genitas esse, ut a vi stimulatrice determinatos recipere motus, continuare & ad organa nostra deferre, queant.

§. XII.

Actuositas mammarum, quae in Galactopoiesi versatur (§. VI.), ex stabilito optime consensu (§. XI.), ceu fonte primario, redundat. Vires enim motrices, quae in arterioso illarum systemate resident, inde in primis, justo cum moderamine intus excitatae, emergunt (§. IX.). Solentque ut plurimum sensim & sine sensu emergere ullo, ita ut, quando, unde, & ubi cieantur, a feminis percipi nequeat. Gravidis adultioribus, prolis generationi serius adhibitis, tantum dolorem quendam, compunctioni similem, & sponte ac brevi evanescentem, subinde afferunt. Arteriae jam, viribus intentis, crebriorem validioremque, tum systolen, tum diastolen, ingrediuntur. Canales enim vivi & elastici sunt, qui non patiuntur se fortius irritari, quin duplicem in motum illum, veluti oscillatorium, erumpant. Quemque cum sustinent, humores influentes citatiorem ad cursum statim adigunt, quo largius sibi prospiciant. Sed notabile eorum flumen arteriae mammariae non modo in se, verum etiam in truncis, a quibus oriuntur, proximis accelerant. Namque continuatae his, communi

D

divi-

divisionis lege, aëtuositatem suam (nisi quam forte per consensum jam inductam credas) facile communicant. Praeterque eam, vel consimilem fere, sola fluidorum suorum velociori propulsione in ramos inferunt. Quo enim illorum undas in se rapiunt citius, eo ut sequentes continuo rivo celerius advolvantur, efficiunt. Nihil abest, quin hac actione stimuli excurrentis vim, quae alias ad imminutam resistantiam referri solet, aemulentur. Liquet hinc, non inepte dici posse, quod ex circulationis campo fluida ad organa alliciant galactopoietica (§. V. n. vi.), vel, ut placet Veteribus nostris, attrahant. Non constat, quantum sit spatium, per quod potestatem suam alliciendi, vel attrahendi, producant. Videntur saltem minime tantum valere, eam ut ad truncum aortae & cor musculosum exporrigant (§. IX.). Ex vicinioribus ejus ramis sat trahant humorum, quibus repleant se & ad lactis confectionem utantur. Iis igitur copiosius investis, primo & ultimo graviditatis tempore, majorem naturali mammis magnitudinem creant. Qua attente parum considerata, animum fere tibi inducas, quod futurae actioni illas praeparent.

§. X I V.

Systema mammarum arteriosum, ducta ex consensu aëtuositate singulari (§. XII.), veram Galactopoieseos rationem complectitur. Equidem, aucto inde motu naturali, praeclaram recipit vim humores copiosius alliciendi, ex quibus nectar suum conficiat. Ingruente lactationis periodo (§. III.), febris quaedam accidit, quae *lactea* vulgo vocatur. Haec, sim-

simplicioris continuæ species, violenta ex mutatione, quæ puerperæ etiam post partum felicem ut plurimum evenit, consequitur. Incipit levi cum frigore & horrore, brevique in calorem mitem pariter ac humidum transit. Quo nascente & uno alterove durante die, mammillæ pleniorē longē, ac antē, habitum induunt. Nimirum collapsæ, fluentibus lochiis, erigunt se, crescunt omnem in ambitum, indurescunt & nimia sæpe ex tensione dolent. Siquē tunc strenue fugantur, paratum liquorem lacteum (§. III.) continuo expromunt. Videtur hinc facili ratiocinio inferri posse, quod febris illa ad ejus generandi usum quam maxime spectet. Neque sane dubitandum, quin &, secundum Dynamics medicæ principia, reapse multum proficiat. Etenim, moderatiori licet, quo fluida agitat, impetu hæc, repetitis circuitibus, mammas crebrius offert. Eoque arteriosam harum, ut corporis universi, fabricam ad solito majorem etiam actuositatis gradum evehit. Num autem quaeso ea pollet vi, qua lactis genetricem ibi provocet? Num forte, humorum copia provocet, in laxatas ex distensione prægressa glandulas convectæ? Conjectura hæc, ingeniosa fateor, non minorem veri, quam auctoritatis, speciem præ se fert. Exponitur enim in Medicina mechanica tam erudite ac eleganter, ut, veluti res demonstrata, in animos facillime influat. Verum cum gravi multorum consensu comprobata sit; fallere tamen, cuique, vim febris serio putanti, apparet. Næ lactea illa, ut quæque universalis, totum solidorum, vasorumque præsertim, systema invadit. Eo, quo hoc percellit, modo rapidiorem quaquaversum humoribus motum, circularem dictum, conflatur. Praeter quem

haud sciam, quod ullum, qui in unam potius, quam alteram, partem irruat, conflare possit (§. IX.). Idque peculiari quodam beneficio, quo nomen adeptum mereatur, afficere mammas. Neque, laxatis his an plus, quam aliis, tribuat faveatque organis, quemquam edocet. Nam laxiora in iis multa sunt, cordisque potentiae vel propius subdita, quorum actionem minime provehat. Quid? quod lactantibus, incepta feliciter ac continuata Galactopoiesi, saepe numero plane absit. Videtur ergo mammis non posse prae aliis ferre suppetias, nisi singulari prorsus actuositatis incitatione (§. XIII.) advocetur. Atque ferre tunc iis, non fecus ac quaevis alia febris, in qua particularis quaedam fluidorum directio, a stimulo, alicubi haerente, producta, contingit. Similis quaedam ejus, sed violentior, haemorrhagiis, fluxionibus, ophthalmiis, tumoribus &c. subesse, per saepeprehenditur.

§. X V.

Ad lac apte parandum suctio assidua mammis plurimum infervit. Solo quin iis sufficiat, silente prorsus uteri consensu (§. XIII.), nemo, ponderatis observationum allatarum momentis (§. X.), in dubium amplius vocabit. Neque id mirabitur valde, si quid & quantum actio illa oris voluntaria possit, secum reputaverit. Haec, celebrium Physicorum judicio, cum ea antliae pneumaticae perbelle comparari solet. Cujus appositaeque campanae vitreae vicem os externum internumque oppido pulchre gerit. Labia nempe, molliter arctata & porrecta paullo extrorsum, in
tubuli

tubuli quasi formam, qua coeunt parte, se componunt. Eaque mammae papillam eminentem capiunt integram, includunt exacte, unaque cum apice linguae & gingivis anterioribus mediam commode sustinent. Quibus sic constitutis, sugens e. g. infans, adducto veluti embolo, alluentem intus retrahit a vertice papillae aerem, ita ut ibi quandam vacui speciem efficiat. Erumpit tunc ex eo in cavum os paratum lac, idque toties, quoties lactens minimis intervallis intermissam, ad satietatem usque, suctionem repetat. Quae eo dein expeditius cedit, quod pressionem atmosphaerae in superficiem mammae aequabilem excipit. Adde demum praesentem, quam praestat, papillae irritationem, qua sessilem surgere, parvulam grandescere, ductulosque galactophoros secum extendere, ad faciliorem lactis emissionem, facit. Liquet hinc fortasse, quam egregie ei promovendae simplici ratione mechanica conveniat. Sed perfectiori multo reor non ejus emissionem solam, verum ipsam quoque generationem, amplectitur. Mammae sanae ac vegetae admodum quidem irritabiles sunt (§. XI. XII.); at maxime tamen papillae. Quae simulatque vel lenissime tangantur, retractae prodeunt, extuberant mirifice & molles, membri virilis titillati fere instar, durescunt. In consensum facile, e quibus enascuntur, trahunt mammas, easque vigore sensuque suavitatis plane inexplicabili perfundunt. Quidni igitur actuositate necessaria & ad Galactopoiesin accommodata (§. VI.), similique ejus, ab utero oriundae, animent? Obsequiosaene a stimulo impressos sibi motus, tanquam ex uno manantes foco radios, quaquaversum per illas spargunt? Re bene considerata, credere licet,

quod , aequae ac membrum , cieri aptae vi agant vitali, quae concitata, tanquam libido, se diffundat. Proinde excitulata mammarum fabrica arteriosa (§. IX.), fieri omnino potest, haec ut non gignat modo, sed, continuo etiam vasorum ductu, lac eliminat.

§. X V I.

Expositae potentiae motrices, tam internae (§. XI. XIV.), quam externae (§. X. XV.), ad organa nostra galactopoietica pertinent. Eo, quo emergunt, loco, tempore, ordine ac moderamine singulari, definito Naturae usui perfecte respondent. Ecquid enim convenientius, quam primas ibi emergere, ubi, antequam lucem ingrediatur, foetus residet? Petereque inde seorsim mammas, ad otiantes officio suo, cui natae sunt, secretorio tempestive accommodandas? Non videtur igitur, id negotii ulli alii corporis muliebris parti, quam utero, rectius potuisse aequiusque committi. Qui, quem molli sinu suo continet, foetum dum edit, mammis quasi continuo tradit nutriendum. Quare etiam cum iis, muneris cognatione conjunctis, tam intime consentit, ac si proxime continuatus foret. Ad haec mutato violenter statu suo, eoque acrius lacerato systemate circulatorio, puerperis febrem lacteam (§. XIV.) creat. Cui an constrictus post partum, accumulata materie chylosa, ansam quoque, ut statuitur (i), praebeat, nihil disquirere hic attinet. Actioni laudatae uteri succedit acceditque auxilia-

(i) Ab Erud. L. BIKKER. in Tract. cit. c. XV.

xiliatrix suctio (§. XV.). Quae eo esse opportunior, quod ad infantem alendum unice spectet (§. I.), sponte cognoscitur. Cumque percommode papillae, mobiliori accidat mammae parti, per totam se efficacissimam semper adhibet. Quibus consideratis, numquid opus fortasse sit, ad Galactopoesin revocare Plethoram, plane apparet. Haec apud multos, ut omnes inter constat, Physiologos tantum valet, ut principis causae ejus locum obtineat. In quo quidem non a Veteribus modo, sed Recentioribus etiam, quorum venerere auctoritatem, sola fere poni solet. Eorum item ad sensum, qui, exhibitis nuper disquisitionibus de generatione lactis &c., propositum a Soc. Erudit. Harlem. praemium reportarunt, toti se convertunt (*k*). Verum licet palam proferre, quod minime dissimulandum, doctrinam illam memorabilem ab observationibus, tum theoreticis, tum practicis, abhorrere. Etenim primum post puerperium, cum lac maxime oritur (§. XIV.), mulierculae, effusis pleno quasi alveo lochiis, nulla re minus, quam sanguine, redundant. Cujus vel necessariam sibi copiam deesse, ipsae lactantes macro extenuatoque habitu suo saepe testantur. Aegrotantes deinde, quae, venae sectiones passae largiores, haemorrhagias &c., nihilo fere segnius pergunt parare lac, non raro occurrunt. Tum contingit porro, quod praeter alios (*l*) videre memini, ut, toto lactationis tempore, men-

(*k*) Cl. M. DAVID. in Dissert. gallice conscripta de Generat. lactis &c. Act. Harlem. P. VII. inserta. Erud. L. BIKKER. in Tract. cit.

(*l*) Ortlob. oecon. part. p. 107. HARDER. prodr. phys. c. 10. E. N. C. Dec. I. a. 9. 10. obs. 9.

menstrua aequae ac ante largiter edant. Post haec repetere oportet, eam esse suctionis vim, quae sola, ut dicunt, mammas utriusque sexus in actum deducere possit (§. XV.). An autem veri quaeso simile, corpora illa, virilia sint, vel feminina, sanguinis redundantiam alere omnia? Vel ingenerare sibi, priusquam casu lactent fortuito? Postremo, missis pluribus, vix ac ne vix quidem intelligas, plethora, si qua admittatur, quomodo ad mammas perveniat. Necessè equidem est communi perveniat proxime arteriarum mammariarum ductu. Quae tamen nec ita sitae, nec conformatae sunt, ut vicinis aliis, vel remotis, cordis & aortae impulsui directius pateant. Contra quo rectiori ex subclavia & axillari angulo ad thoracem descendunt parvae; eo ostiis suis fluenti cursum minus excipiunt. Quibus additis, quae in medium allata (§. IX. XV.); omnis ferme dubitatio evanescit.

§. XVII.

Arteriae mammae (§. XVI.), actuosiores (§. XIII. XIV. XV.), ex sanguine, quem allecunt copiosius, lac secernunt. In confesso est, quod veram, qua hoc in opere versentur, rationem fabrica, distributione, ac incitatione mirabili sua, contineant. Ad eam igitur indagandam, expedita quodammodo arte subtili via, accuratius jam persequendae forent. Sed non convenit scopo nostro, in amoenissimum ceteroquin rerum harum anatomicarum campum excurrere. Quem qui, duce Illustri B. S. ALBINO, Praeceptore & Promotore meo aeternum suspiciendo, ingressi
haud

haud dudum & fere emensi sunt, Commilitones eruditi Adenographiae specimina dederunt (*m*), L. hic merito commendanda. Ex iis luculenter patet, tantam esse structurae glandulosae subtilitatem, ut, licet studiosissime per-vestigata sit, penitus erui nequeat. Ad secretionem quod attinet; haec omnem etiam ingenii humani perspicaciam effugere, plane demonstratur. Equidem pendet in primis procul dubio a motibus vitalibus, mirifice modificatis, quorum origo & forma abdite latent. Quod vero apertum, recte dum pergunt, ex massa sanguinea, ad mammas delata, lactis eliciunt materiem perficiuntque (§ V. n. VIII.). Materies isthaec chylus est, ex alimentis in primae coctionis officina paratus, & sanguini affusus atque commistus. Isque, feriantibus mammis, communi lege circumduci, ac in humorem illum purpureum virtute admirabili Naturae cummutari solet. In lactantibus autem iterato circuitu cum eo istas affluit glandulas, ut separatus paullatim in verum lac convertatur. A quo enim, communia quoad percurrit vasa, colore dilutiori, tenuitate, sapore &c. semper discrepat. Quare non simplicem tantum separationem, quasi percolaretur (*n*), sed mutationem notabilem in mammillis subit. Hae profecto tam mire composito fabricatae artificio sunt, ut aequae, ac glandulae reliquae conglomeratae, salivales &c., organorum secretoriorum dignitatem sibi vendicent. Qua attente spectata, vix credo
nega-

(*m*) Doctiss. D. FRUYTIER Dissert. de generat. lactis. J. G. LOCHER. Diss. de secretione glandular.

(*n*) Erud. L. BIKKER. in Tract. cit. p. 52.

negaveris, quod lac neclareum, tanquam succum singularem, generent. Elaboratum itaque ab arteriolis minimis fecernentibus solito more in excernentes, canales nempe galactophoros, confestim deducitur. Hi cum perquam tennes indolisque propemodum venosae sint; allatum continuatis recipiunt ramis, aliquamque diu, nisi abundant, morantur. Simulatque autem suctione arrectis concientur papillis (§. XV.); systolici cujusdam motus affecti specie, acceptum tempestive dimittunt (§. V. n. VIII.). Admotus quippe plerumque tunc infans est, cui provido collectum consilio lac praebeant hauriendum.

§. XVIII.

Quibus sic cognitis, de functione mammarum sana fati fortasse nunc actum esse videtur. Eo enim, quod propositum erat, contemplatio ejus perducta est, ut ad pathologicam expositionem nostram scite conferri queat. Haec concinno, quo solet institui, ordine a *morbi notione* profiscitur. Quae ut recte evolvatur, secundum diversitatem conditionum, quibus affectae mammae laborant, distinctae quaedam species constituendae sunt. Binae ex his praecipuae, quae plurimum a se differunt, a lactis tum secretionem, tum suctionem, impedita (§. II.) manant. Prior, quae maxime hic spectanda est, in *actuositatis memoratae* (§. VI. VII. VIII.) *defectu* consistit. Qui pro varia, qua oritur, vi diversum valde organorum secretoriorum statum, a sano magis minusve remotum, contingit. Observes nempe primum, quod ibi absque ulla fere alia, ac motus, ad Gala-
cto-

Etopoiesin intenti, mutatione innascatur. Nihil enim ad-
 versi, quod quidem sentiri possit, praeter ejus vacationem,
 lactenti forte soli quandoque illaetabilem, producit. Cujus
 hinc Naturae legi congruenter (§. 1.) habita ratione, tan-
 tum morbi nomen obtinet. Accidit autem porro, ut eo,
 seu organico quodam partium, secretioni inservientium,
 vitio manifeste contrahatur. Quod, uti late patet, tam in
 firmis, quam fluidis, & utrisque simul, residere potest.
 Nimirum in firmis, ubi vel laxae nimis ac debiles, vel
 rigidae & effoetae, vel malo conformatae modo, constri-
 ctae vel occlusae, vel demum exesae & destructae, sunt.
 In fluidis vero, si vel deficiunt necessaria, quae chylo probe
 sint imbuta (§. XVII.), vel, qualicunque labe concepta,
 mammaram actionem eludunt. Multifariae hae diatheses,
 a sanis omnino alienae, veram, quem conficiunt, morbi
 faciem nobis quam diversissimam exhibent. Eamque, plu-
 ribus paucioribusve sinistro casu confluentibus, vel simpli-
 ciores, vel magis compositam, reddere solent. Atque
 prout inter se multum discrepant, dissimilem etiam ratio-
 nem tollendi actuositatem laudatam admittunt. Posterior
 species, quam impedita praebet suctio, in praeternaturali
 ductuum galactophororum constitutione sita est. Haec,
 vel ad inertiam & infirmitatem, vel angustationem nimiam
 ac complicationem, vel obstructionem coalitionemve, re-
 ferri potest. Accedunt plerumque vitiatae mammaram pa-
 pillae, quae nempe quocunque infortunio vel desunt pla-
 ne (o), vel altius iis inhaerent, vel male habent. Quan-
 doque

(o) Eph. N. C. Dec. II. a. 10. obs. III. Dec. III. a. 4. obs. CVII.

doque tamen vel solae, cum inflammatae, exulceratae, fissae, excoriatae, exasperatae, erosae &c. dolent, vel grandiores justo exstant (p), prohibent suctionem, aut aegre vix ferunt. Qua ita cessante, lactis accumulati vis adeo saepe increfcit, ut mammae inde distentae vehementer graventur.

§. XIX.

Morbus, generaliter descriptus (§. XVIII.), primo, quo distinctus est, ortu suo in *Idiopathicum* & *Sympathicum* dispesci solet. Ille, qui talis proprie dicendus, mammis, iisque solis, proxime insidet. Hic, veluti peregrinus, ex remotiori quavis corporis muliebris aegri sede in eas quacunque via erumpit. Quique exinde mutato morbi primarii nomine, secundarius, seu symptoma potius, appellatur. Uterque inter se, non origine solum, sed, quod praecipuum discrimen attinet, natura distat. Quae, animo bene perlustrata (§. XVIII.), tam varia esse, ut plerasque, etiam oppositas, solidorum fluidorumque affectiones recipiat, cognoscitur. Unde arbitror oppido magnam arguas caussarum diversitatem, quam in se complectitur, ab Illustri Praeceptore aetatem percolendo H. D. GAUBIO in Instit. pathol. med. §. 833. succincte nervoseque propositam. Ad eam, ordinate prosequendam, convenit,

- 1º. Expendere causas, quae, illaesis cetera partibus, aëtuositatem praecellentem adimant;

IIº.

(p) Eph. N. C. Dec. III. a. I. obs. III.

- ii°. Quae illarum potissimum organicam structuram notato modo multiplici laedant;
- iii°. Quae humorum quantitatem qualitatemque requisitam tollant.

§. X X.

Status mammarum morbosus (§. XVIII.), quem lactis defectus insequitur, non, nisi ex causis suis, recte perspicitur potest. In quarum consideratione amplissima, quae primum se offerunt, simplices ad imminuendam solum actuositatem pertinent. Usu frequenter venit, ut lactantis, cujusque aetatis temperieque, mammae, modo succio cesset, vel remissius fiat, cessent quoque lac parare. Aliae, quae veluti pigriores sunt, desistant tantum citius, tardius aliae. De quibus, cui sponte videntur desistere, aegri infantis mortem praenuntiare, vulgi fert opinio. Quae vero quam vana sit fideique absorta, quisque puto, qui paullulum saltem advertat animum, facile percipiat. Namque si ponitur infans, & quidem gravius, aegrotare, quid evenit? Imbecillis, simulque saepe nauseabundus, solitum vel nequit haurire alimentum, vel fastidit. Quapropter, nisi forte alterius adhibeatur, succio assidua aut intermitteri, aut abrumpi, solet. Eaque deficiente, mammae, paullatim flaccescentes, lactis minus minusque & denique amplius nihil ingenerant. Interea, crescente fortuito morbi violentia, infans vita fungi potest. Sed, ut liquet, ea superata, convalescere idem, ita ut ipse tunc praesagii falsitatem redarguat. De re igitur certe constat, cujus rationem ex dictis

(§. XV.), consequi licet. Suctio sane strenua atque frequens mammis necessariam ad suscipiendam prosequendamque Galactopoiesin conciliare actuositatem valet. Ubi nunc desinit, haec, velut ablata causa irritante, sensim sensimque remittit. Organaque hinc illa, perinde ac quaevis alia, quorum motus stimulis regatur, subductis his, conquiescunt. Vel si forte illico non residant otiosa, brevi tamen, levique ut plurimum negotio, reprimi queunt. At minime credas, quod eo statim omnem prorsus, quam sustineant, actionem deponant. Retinent utique repetuntque sibi commissa, quam vocamus, vitalem moderatiorem, quaque, ut ante, uti pergunt (§. VI.). Non hujus est loci, quae vel in nutrice (§. XVIII.), vel lactente, occurrant, suctionis impedimenta recensere. Neque conjunctam subinde cum ejus cessatione subita singularem matris, praesertim tenerioris, affectionem inquirere. Satis notasse fuerit, quod haec, ingrata si accidat, vel a naturali aversa, lactis proventus remorari, vel plane arcere, queat.

§. X X I.

Ea ergo mammarum vis, lactis genitrix, est, ut nisi singulis fere diebus citetur, sanis sponte excidat. Hoc pacto, praeclare constituta sapienterque, & diu servari integra, & tempestive compesci, potest. Sed, uti a naturalibus, ita etiam praeternaturalibus, causis, levioribus, gravioribusve, devinci. Etenim substantiam incolit organicam, ex qua, tanquam altrice & directrice sua, plurimum pendet. Ea hinc labefactata, abesse nequit, quin
simi-

similiter, ac physica quaeque vitalis, languescat, vel plane decedat. Est haec, ut apparet, sic dicta organorum galactopoieticorum debilitas, de qua agitur. Omnis in solidam cadit fabricam illorum vasculosam, cujus proprium in contractionem nisum justo exiliorem denotat. Duplex esse concipitur, nativa altera, altera adventitia. Illa, congenita, jam embryoni, vel foetui feminino, & haec nato, ac magis minusve adulto, obtingit. Multae & variae sunt utriusque causae, quae cum ex Pathologia, tum Praxi medica, constant. Operae pretium erit, crebriores quasdam, communi ex vitae usu petitas, continuo nexu afferre. Non mirere admodum, quod tenuioris fortunae minus, quam amplioris, mulierculas occupent. Hae enim, quibus laeta exstat culina, delicate maximam partem molliterque vivere solent. Pleraeque, vel multae, appetitui indulgendo libere, teneriores solum suavioresque cibos, parcius vel largius, capeffunt. Ut parum subinde sitiant; potionem tamen adhibent, eamque aquosam praesertim tepidam calidamve. Inclusae domi tantum non latent omnino, rariusque in publicum prodeunt. Exceptis levioribus exercitiis, membra tam parum movent, ut vitam solummodo sedentariam sequantur. Cujus cultrices interdum invitas lassitudinis fugeret sensus, si quem ex somno longiori, vel sessione, non perciperent. Debiles hinc, inito connubio, vel infoecundae sunt, vel gravidae immaturos foetus, aut infantulos edunt imbecilles. Neque horum nutritione in utero lactationem peragant felicius. Quam enim, nisi detrectent, vel aegre, vel prorsus non, sustinere queunt. Quandoquidem molliculae, quae nervorum infirmitatem

accusent, facta suctione paullo fortiori, motibus spasmodicis facile corripiuntur. Quin lactis etiam boni penuria, elapso quodam a partu tempore, saepius laborant. Ejus equidem actione secretrice, debilitatis mammarum vasis, materculas fungi posse, nemo sibi unquam persuaserit. Idem nunc, quod illis, & sanis quibuslibet, morbis violentioribus infirmatis, contingit. Exempla si quaeras, hystericae, leucophlegmaticae, hydropicae, atque febribus, vel acutis inflammatoriis, vel lentis, periodicis, saepe & diu conflictatae, praebent. Quae, similesque plures, laxae compagis, plurimumque extenuatae, lacti generando non esse, experiuntur. Vires quippe corporis diminui exhauriri nequeunt, quin mammarum quoque deflorescant & exspirent.

§. XXI.

Systema galactopoieticum, contracta non solum debilitate (§. XXI.), sed rigiditate etiam adversa, torpescit. Etenim in confectum venit, apposite quod agere non possit, si nimis, vel laxum, vel firmum, sit. Hoc, pro inertia materiae terestris, qua aucta peccat, ab indole sua irritabili semper degenerat. Torpidumque inde adeo evadit, ut naturalibus, quibus cieatur, stimulis (§. X.), haud amplius, vel aegre, respondeat. Quocirca, maximo sane detrimento, una cum sensu vitali, animalis aemulo, actuositatem suam facilem ac expeditam amittit. Praeterea, ubi ex membranarum duritie rigidum existit, solitos nec admittere, nec exsequi, motus potest. Ad quos obeundos
tale

tale quam ineptissimum esse, ex mechanices etiam prin-
 cipiis intelligas. Immobile ergo, vel minus justo contra-
 ctile, ad propellendos per subtiles plexus suos vasculosos
 humores minime pollet. Neque satis libere intus patet, ut
 commodum aequabilemque transitum iis concedat. Nam
 ut rigiditatem induit majorem minoremve, parte sui fibro-
 sa, vel membranacea, contrahit se magis minusve, &
 mutuum ad contactum adductis parietibus concrefcit, ita
 ut, vel fluidorum iter coarctet, vel claudat. Depravatum
 hujusmodi, idque vario gradu, quin torpeat vehementer,
 aut conquiescat plane, non facile dubites. Perspectum
 diu & cognitum est, sexum quidem sequiorem corporis
 firmitate a virili ut plurimum longe abesse. Femininum
 enim tota habitudine sua externa atque interna mollitudi-
 nem, glabritiem, candorem, verbo, teneritatem praefert
 singularem. Eamque non puellare tantum & juvenile, sed
 aetate provectius, in se luce clarius meridiana ostendit.
 Qua de causa certe, ceteris paribus, non adeo esse rigi-
 ditati, ac masculinum quodvis, obnoxium, bene advertunt
 periti. Verum licet, fateor, minus obnoxium sit; potest
 tamen utique eam serius ocus nancisci. Femellae profecto,
 pariter ac viri, varia saepe debent vitae subire incommo-
 da, quae effugere non possint. In aere alias aspero frigore,
 aestu alias ingente, molesto versari. Artus duris valde
 exercere laboribus, quibus necessarias sibi res prospiciant.
 hisque exhaustae cibis saepe crudis, aridis, lentis, austeris
 & acribus, se sustentare. Vigiles multa & opera & cura
 noctes haud paucas nonnunquam perducere. Atque prae-

F

ter

ter haec omnia alias aliis graviores tolerare calamitates & aerumnas. Quae incommode duriterque sic victitent, a statu naturali ad rigidum & siccum fere desciscunt. Ex quo fit, ut vel steriles, vel minus foecundae sint, sique pariant, lacte destituantur.

§. XXXIII.

Officinae lactis glandulosae tam mutabiles sunt, ut, praeter traditas torporis species (§. XX. XXI. XXII.), plures, magis minusve morbosas, concipiant. Ex quibus, quae hic ad rem considerandam attinet, solo etiam felici aetatis decursu nascitur. Clari annotant Anatomici, glandularum quarundam hoc proprium esse, ut ceteris partibus plurimis citius longe marcescant. In corpore juniore sano, incrementum adeptae suum, magnitudine justa & forma emineant. Grandes hujusmodi carne rubella, molli, humida & vasculosa, egregium turgente in modum, praeditae sint. Sed, exactis juvenilibus annis, gracilescant paullatim, veluti tabe confectae, siccescant & pene dispereant. Quem marcorem, manifesto Thymi &c. exemplo, trahant omnes, quae cui usui sint, haud facile, si unquam, detegas. Illae equidem conspicuo, vel certo, quod ratio forte aperiat demonstrarique possit, secretionis munere nequaquam funguntur. Affines iis & cognatae quodammodo, mammae, progressu aetatis longiori, etiam extenuari multum & absumi videntur. Quae enim juvenibus pulchre exstant eminae, turgent atque vigent, exoletis subsident virginibus

&

& veluti deflorescunt. Hocque semper deflorescant magis, quod nec uteri (§. XII.), nec oris sugentis (§. XV.), vim stimulatricem percipiant. Cujus alioqui beneficio conceptum plerumque vigorem suum diutius continere solent. Annosae hinc virgines si, mutata caelibe vita, jugalem aliquando subeant, partus lactationisque negotio, vel matrimonii fine, non raro excidunt. Reperiuntur aliae, quae ad venustam, quam gracilem vocant, formam sibi fingendam, pectus & abdomen arctissimis compagibus includere solent. Eumque in finem factitios non solum inducere thoraces, sed, applicatis adstringentibus remediis, mammarum praesertim augmentum inhibere. Hae inde compressae partim, partim constrictae, juvenculis quandoque jam marcent, ita ut infantulorum spem quasi frustrentur. Quin ipsis demum materculis, post nimis crebras diuque continuatas suctiones, ante menstruationis terminum, concidunt haerentque flaccidae. Credibile tunc, quod, enervata vaforum substantia, virtutem irritabilem, tantum non omnem, exuerint. Quae anne iis perinde, ac genitalibus utriusque sexus, lapsu annorum libidinisque excessu, evanescat, sedulus quisque Naturae cultor noverit.

§. X X I V.

Inter ea, quae mammarum functionem saepe perturbant perimuntque integram, Animi affectus eminent. In quibus, oeconomiam animalem cum maxime concutiens, terror primum commemorandus est. Hic, lactanti obortus gravior, Galactopoiesin totam continuo opprimere, quam

frequentissime observatur (q). Quin repentino natus ex tonitru vaccis etiam aliisque brutis, coeli inclementiae sub dio expositis, ubera tam vehementer percellere, ut lac fere omne exhauriat. Ingens porro timor, moeror (r), horrorque ejusdem generis mala conficere, quibus lactatio aboleatur. Atque demum ista curas acriores, sollicitudines nimias, similesque plures mentis afflictiones, conflare, crebrius experiuntur. Hae cum aliae aliis sint graviores, non omnes & singulae aequae magna cum vi in corpus se effundunt. Quod equidem, priores inter relatus, terror tam dire plerumque convellit, ut, prae aliis vitae muniis, secretoria & excretoria saepenumero repente sufflaminet. Etenim quam frequenter contingit, ut aequabilem manantium menstruorum cursum inhibeat? Ut materiae perspirabilis, salivae, urinae &c. evacuationem intercipiat? Ubi jam sinistro eventu in mammas incidit, praesentissimam inducit lactis suppressionem. Nimirum, ut alias ubique solet, systema illarum irrumpit vasculofum, tamque valide constringit, id ut injectis veluti vinculis exsolvere se nequeat. In quo statu, qui a naturali longe recedit, vix ullos quandoque, praeter spasmodicos tremulosque, motus praestare valet. Quibus tantum abest, ut humores ad secretionem afferat, ut intercludat plerosque, cogat, nisuque adverso repellat. Quid? quod, perstrictis simul corde & arteriis, paucos modo, inaequalibus quasi fluctibus irruentes, accipiat. Quocirca, vel dejecta prorsus, vel deminuta,

(q) RIEDLINI Lin. med. a°. 6. sept. obs. V.

(r) WEPFERI Obs. p. 43.

nuta, actuositate tantum non plane quiescit. Pari ferme modo, sed leviori, a reliquis Animi pathematibus nominatis affici solet. Obnoxium omnibus, potissimum fato singulari in lactantibus, aliud ex alio malum contrahit. Quae vero inde contrahat plura, ab intermissione actionis secretoriae diversa, non licet hic enumerare. Neque plures percurrere pathematam illorum effectus, qui lactis defectum pariant.

§. XXV.

Abolendae Galactopoieseos potestatem, quae in Animi affectibus sita est (§. XXIV.), violentiores, quot quot sunt, stimuli corporei imitantur. Multijuges hi, ab acribus plurimum oriundi, exitiosam in corpore humano, & teneriore praesertim feminino (§. XXII.), ludunt tragoe-
diam. Namque irritando illud, vel quovis modo alicubi laceffendo, excitant erethismum, in constrictiones inordinatas & validas saepe abeuntem. Quae ubi, quacunque ex ejus sede, sive interiori, sive exteriori, latius emanant, ad mammas evagari possunt. Correptis his, solemnes variorum secretiorum motus, vel distinent omnino, vel vehementer depravant. Non exiguus morborum numerus est, quos aut conficiant proxime, aut symptomatum more sequantur. In spasmodicis sic dictis omnibus, hystericis, colicis, asthmaticis, febrilibus, aliisque, magis minusve aperte se produnt. Ne atrociores memorem convulsivos, quibus subesse, & intima nonnunquam pervadere viscera, deprehenduntur. Hinc lactantes femellae, quae passioni-

bus istis affligantur, lacte vel omni carere, vel subito quandoque destitui, solent. Sed nunquam destitui noxa certiori, quam si constrictiones illae, vel similes quaeque, non cito satis laxatae, pertinaces procreent obstructions. Quibus coortis, adactus fortiter & impactus sanguis in tumorem concrevit inflammatorium. Qui, pro majori minorive extensione sua, vasorum mammariorum plura pauciorave vicina urget undique, coarctat, ac comprimit. Ea, cum in suppurationem vertitur, distenta nimium, & continenti impetu rupta, aggesto cum cruore colliquescent. Exinde genito & tempestive educto pure, coeunt rursus, cohaerent integra, humoresque suos coercent. Verumtamen haud infrequenter tam inique coalescent, ut minus, quam ante, pervia, vel male conformata, lacti secernendo inepta evadant. Neque raro accidit, ut innumera, coalitionis optatae loco, diuturna exulceratione depascantur. Contra & infarcta valde, & actuositate exuta, immobili cum materie in durum, asperum, & indolentem, scirrhum degenerant. Cui infelici casu accedente forte phlegmone, acriori rodentis canceri saevitie exesa prorsus tabescunt. Mammillae, horum uno alterove vitiorum obsessae, praesentissimo damno, nutricem lactis generandi facultatem deperdunt. Eamque, etiamsi subinde consanescunt, amisam semel, quidquid ars curatrix moliatur, vix unquam recuperant. Ex quibus liquet, an ne etiam nimia laborare irritabilitate, & quasnam inde consequi affectiones, possint.

§. XXVI.

En jam, quam multiplex morbi ratio sit, qui, commune symptoma, verum lactis defectum, inducat. Causae ejus, quae percensitae sunt (§. XXI–XXV.), ad organicam potissimum mammaram actionem prohibendam pertinent. Earum aliae cum aliis interdum concurrunt, & exitiali quaedam nexu cohaerent, quo se invicem excipiant. Quin adjungere se etiam iis possunt, quae, requisitam quantitatem qualitatemque humorum tollendo, Galactopoiesin impediunt (§. XIX. N°. III.). Manifestissimum hoc est, quod mammaram actuositas (§. IV.) in irritum cadat, si massa sanguinea chylo deficiatur (§. XVII.). Solet autem tum defici, cum lactantes, vel longam tolerant inediam, vel cibo tantum duro aut nimis parco utuntur (§. XX.), vel primae digestionis suae organis languent. Illaetabiles hae vitae conditiones, praeter adversitates varias miseriaeque, omnis fere generis morbos, tum acutos, tum chronicos, insequuntur. Res angustae & calamitosae, inediam quae afferant victumque asperiores, mortalium fortasse fugiunt neminem. Religiosa, vel sacra, quae colant jejunia, nutrices, vel matres, si ullae, perpaucae sunt. Evenit autem saepius, ut, laesis graviter manducationis, aut deglutitionis, instrumentis, nihil, vel perparum, alimenti, possint ingerere. Complures, ob fractas, vel alteratas, vires coctrices, ingesta, etiam facilia ad concoquendum, vincere nulla. Obstructisque demum viis, seu interclusis, necessariam chyli laudabilis copiam in sanguinem non recipere. Aegrae tales, qualescunque sint, vix lactis quidquam,

velli

vel ne minimum quidem, generare valent. Ea enim sanguini, qui ceterum abundet, deest materies, ex qua alibi-
le illud fluidum suavissimum generent. Neque hic indigen-
tiae status diu unquam manet, quin mammae labefactatae
desinant esse actuosae. Quae duplex noxa est, quam ex
qualibet sanguinis abductione, vel detractioe, violenta
quoque capiunt. Isthaec primum, orta quavis immodica per
vias, vel naturales, vel praeternaturales, evacuatione con-
tingit. Hincque in diarrhoea, dysenteria, diabete, sudore,
haemorrhagia quaque, & ulcerum humidorum fluxione diu-
turna, fieri cognoscitur. Dolores porro, qui fixi, inflam-
matorii, aut acres sunt, majori minorive cum impetu sem-
per comitatur (s). Ostendit se partium, iis affectarum,
tensione, intumescencia, colore mutato, pluribusque,
quae edit, phoenomenis (§. XIII.). Usu demum pleris-
que venit praegnantibus, quibus sanguis ad uterum trahi
dicitur (§. XII.). Flaccescunt illis inde mammae, ita ut
lactatione protinus abstinendum sit. Verumtamen robustio-
res occurrant, quae ea, toto gestationis tempore, sine ullo
fere incommodo, perfungantur.

§. XXVII.

Pervestigatum haecenus est, praelucente Pathologia ratio-
nali (§. XIX.), unde, & quomodo, lactis defectus prove-
niat. Hic, ni fallor, a mammarum actuositate, vel minus
strenue excitata, vel multifariam oppressa atque contracta,
dedu-

(s) R. A CASTRO de morb. mulier. L. IV. p. 583.

deducendus esse, plane perspicitur (§. XVIII.). Diagn-
 sis ejus facilis, absque longiori indagine, erui inde hauriri-
 que potest. Defectus ille, si solus spectetur, indicia sui clara
 & perspicua cuique, leviter modo qui attendat, exhibet.
 Lac enim, spectabile fluidum, quod sanae affatim fecer-
 ant, abesse nequit, quin lactantis pariter, ac fugentis,
 sensu id constet. Neque multiplex mammarum affectio,
 qua nata glandulosus iste liquor deficit, caussarum vim
 (§. XX–XXVI.) ponderanti, obscure apparet. Intermissa
 lactio (§. XX.), ablato uberibus infante, vel remoto,
 quovis consilio, aperta res est. Debilitas, Galactopoiesin
 sufflaminans (§. XXI.), tum ex mollitie ac teneritate cor-
 poris nimia, tum universali actionum languore, patet.
 Rigiditatem (§. XXII.), ei oppositam, siccior justo, con-
 strictior rugosiorque utplurimum, habitus arguit. Eviden-
 tissima marcoris (§. XXIII.) signa mammarum parvitas
 praeternaturalis, gracilitas flacciditasque, praebent. Animi
 pathemata, sinistro oborta casu (§. XXIV.), ex ore ipso
 affectae, vel praesentium, cognosci possunt. Constrictio-
 nes spasmodicae, lactis remoratae proventum, e morbis,
 sibi conjunctis, vel praegressis, emergunt. Mammarum
 tumores, inflammationis, suppurationis &c. progenies,
 symptomata, quorumlibet propria, neminique fere ignota,
 indicant. Chyli defectus (§. XXVI.), incidentibus aerum-
 nis malisque conspicuis, sese manifestat. Ejusque, cum
 sanguine aliorum abrepti, insignia evacuationis cujusque,
 doloris, graviditatisque notis respondent. Diagn-
 sis haec expedita ad Prognosin ducit, quae futurorum eventuum
 praedictiones complectitur. Defectus lactis (§. XVIII.),

in se consideratus, vix ullum, quod metuendum sit, discrimen portendit. Etenim, illaesa prorsus lactantis valetudine, sine alio, ac infantis damno, quod facili negotio farciatur, accidere potest. Auxiliis Naturae & Artis tempestive adhibitis, quandoque etiam ex voto cedit. Sed, si gravioribus forte ex morbis, seu causis, redundet, superari nequit. Hae autem quales sint, ex dictis, vel demonstrationibus practicis, elucescunt.

§. XXVIII.

Quod postremum praecipuumque est, Artis medicae munus ad abolitam Galactopoiesin instaurandam spectat. Oportet enim, cura, quanta possit, maxima, infantis saluti consulat, quae procul dubio felici corporis pusilli tenerique incremento continetur. Idque haud alio quidem ullo, quam alimento naturali, sive lacte humano, sanis exsucto uberibus, rectius obtineri, liquet (§. I.). Praeclara igitur eorum functio, si amissa sit, oeconomiae muliebri ut restituatur, plurimum requirit. Verum, quod sponte advertas, restitui in integrum nequit, nisi cognita, quae adsint, secretionis impedimenta (§. XXVII.) tollantur. Quorum quaedam oppido exigua, alia tantum majori, nonnullaque ne maxima quidem, opera tuto expediri possunt. Ea inter, quae prioris generis sunt, suctio neglecta, vel quocunque casu intermissa, habetur. Haec, modo non nimis diu intercepta sit, alacri si ore repetatur, organa galactopoietica ad pristinam actuositatem revocat (§. XV.). Frictio lenis foveaeque blandus & tepidus (§. X.), per aliquot con-

ti.

tinuatus dies, egregie simul juvat. Ubi porro ex debilitate sola ab opere cessant mammae, non praesentius auxilium, quam in victu laudabili, constitutum est. Ad quem alimenta eupepta & euchyma, juscula scilicet carniū, lacticia, ova forbila, panatellae & ptifanae pertinent. Motus corporis moderatos in aere temperato, Animique affectiones laetabiles, condimenti loco iis addere, prae ceteris mirifice expedit. Quibus legitime dispositis, usu non spernendo quoque remedia analeptica & cardiaca (*t*), humorum cursum caloremque vitalem suscitantia, se commendant. Haec nutrimentis laudatis decoctione, infusione, vel alia, quae placeat, forma probe juncta, effectus edunt praestantissimos. Atque simplex hujusmodi curatio, scienter adhibita, si evacuationes etiam largiores praecesserint, ex sententia plerumque succedit. Sed denique cum graves existunt mammarum morbi, sive idiopathici, sive sympathici; omnibus & singulis accommodatae indicationes therapeuticae aegris sanabilibus, nisi Galactopoieseos, integrae sanitatis certe, restorationem optatam promittunt.

(*t*.) Cl. H. BOERHAAVII Inst. Med. §. 1095. & seq.



